



Baština Akademije nauka i umjetnosti Bosne i Hercegovine

DIJALOG 1-2, 2018. Časopis za filozofiju i društvenu teoriju

Kukić, Slavo; Mujkić, Asim

2018

Akademija nauka i umjetnosti Bosne i Hercegovine

<https://bastina.anubih.ba/items/cd8fbc97-c754-4ac9-89d2-3a15d9c756f9>

Preuzeto s Baštine Akademije nauka i umjetnosti Bosne i Hercegovine

<https://bastina.anubih.ba/>

Predgovor

Istinsko nam je zadovoljstvo da znanstvenoj, ali i općoj javnosti možemo ponuditi novi broj Dijaloga – i novih šest znanstvenih i stručnih radova, jedan prikaz nove knjige i jedan homage čovjeku koji je zadužio bosanskohercegovačku sociološku znanost. Vjerujemo da će pitanja koja ovaj broj problematizira zadovoljiti znatiželju njegovih čitatelja. A kako bismo svoje uvjerenje i potkrijepili, želimo podsjetiti na ono čemu su radovi ovog broja posvećeni.

U originalnom znanstvenom radu Porodica i rat, Sociološko demografski diskurs, tako, Izet Beridan propituje posljedice koje je rat ostavio na bosanskohercegovačku obitelj. Koja, kako i sam navodi, trpi ratne pogibije, ranjavanje i invaliditet svojih članova, materijalne i druge gubitke, koja je bila prisiljena na promjenu mjesta boravka i podnositi sve druge tegobe rata. Demografski gubici bosanskohercegovačke obitelji u ratu i nakon njega, zbog poslijeratnih migracija, na što upućuju svi statistički podaci i oni koje u radu nudi autor, ostavili su duboki trag i na njezino i na stanje čitavoga bosanskohercegovačkog društva.

Originalni znanstveni rad, potom, potpisuje i Branko Morait. U radu About the Subject and Method of the Development of the Republic of Macedonia Civil Code autor se zalaže za kodifikaciju građanskog prava u Makedoniji koja podržava privatnopravnu prirodu građanskopravnih odnosa, distribuciju i odabir materije koja treba biti predmet regulacije unutar buduće kodifikacije i protivi se mehaničkom zbrajanju postojeće kodifikacije zbog koje su stvorene grane građanskog prava u obliku posebnih zakona o određenim građansko-pravnim odnosima.

U radu Pojam i elementi krivičnog djela u pravu Republike Srpske, koji potpisuju Miodrag i Marina Simović te Dragan Jovašević, klasificiranom također kao originalni znanstveni rad, moguće je pronaći informacije o pojmu kaznenog djela, elementima koji ga čine, uvjetima kažnjivosti te vrste djela, materijalnim elementima i radnjama kaznenog djela, društvenim opasnostima koje ta djela proizvode i slično. No, sve to je vezano za Republiku Srpsku te je i sam rad, sukladno tome, posvećen pojmu, elementima, karakteristikama i oblicima kaznenih djela u pravu ovog bosanskohercegovačkog entiteta.

Suzana Bubić potpisuje stručni rad Istospolne zajednice u praksi Evropskog suda za ljudska prava, u kojem razmatra ulogu Evropskog suda za ljudska prava u procesu priznavanja istospolnih zajednica u nacionalnim zakonodavstvima, stavove Suda zauzimate u pojedinim relevantnim pitanjima te mogu-

će odluke Suda u ovoj oblasti u predmetima koji eventualno budu pokrenuti protiv BiH.

Edin Rizvanović je autor preglednog rada Dejtonski ustav – temelji, ograničenja, mogućnosti, u kojem polazi od toga da je u Daytonu potvrđen držav-nopravni kontinuitet BiH, Ustavom utvrđena institucionalna struktura i izvršena raspodjela nadležnosti itd. No, autor tvrdi i da je Dayton verificirao rezultate rata jer je njegov sadržaj odraz kompromisa velikih sila. No, usprkos tome on, Ustav posebice, pruža niz mogućnosti za unapređenje postojećeg stanja, bolju iskorištenost ustavnih odredbi, za unapređenje normativnih rješenja, jačanje temeljnih karika društvenog sistema itd. – dakako, pod uvjetom da se sve to promatra u kontekstu pridruživanja zemlje Evropskoj uniji, prihvatanja njezine pravne stečevine itd.

Pregledni rad potpisuje i Luka Domjanović. U pitanju je rad Zašto je ontologija i nakon Wittgensteina moguća, u kojem autor, suprotno Wittgensteinu, uz pomoć definicije smisla kao onog što upućuje na drugo, pokazuje kako i najopćiji pojmovi i stavovi mogu biti smisleni – i da besmislenost stavova teorijske filozofije ne može slijediti iz njihove općosti, već samo iz njihove eventualne tautologičnosti.

Na koncu, u ovom broju se može pronaći i prikaz knjige akademika Ivana Cvitkovića Religija u raljama politike akademika Slave Kukića te Homage Hidajetu Repovcu (1945–2018) mlade profesorice Sarajevskog univerziteta Sarine Bakić.

Želimo vam od sveg srca da u čitanju ovog broja Dijaloga uživate, ali i da vam ono bude motiv za osobnu suradnju u njemu.

Urednici